

# INUIT ATAQATIGIIT

## Inatsisartuni



UKA2020/Imm. 165  
3. november 2020  
Stine Egede

**Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutigaa suleqatigiillutik suleqatigiissitamik nunat avannarliit killiit niperujoorutaannik erinarsuutaannillu nuutilersukkanik saqqummersitsinissamut katersuisussamik ilisimasalinnik susassaqtunuk ilaasortalimmik pilersitseqqullugit. Nunani pingasuni taamatut saqqummersitsinissamut aningaasartuutissat suleqatigiissitap qulaajassavaattaaq.**

(Aallartitat siulittaasuut Vivian Motzfeldt)

Siullermik siunnersuummut qiimanartumut, qularnanngitsumillu piviusunngoriaruni nuannaarutaalerumaartussamut Inuit Ataqatigiinniit qujalluta kiisalu tapersiilluta ima oqaaseqassaagut.

Kalaallit ilisarnaatigilluarparput ataatsimuualaarnerni erinnanik appillattaarnissaq pingaartittuartaratsigu. Erinarsuuterpassuarnimmi nuannersorpassuarnik taallaateqarpugut nipaannarmik, ilaanni tulleeeriaarsuulluta nuanneqqinnaamik appisimaartakkatsinnik.

Taalliortorpassuaqarpugut imartoosuarnik, tussunngunartunik, killitsinnartunik, qiimanarluartunik pereersunillu eqqaasitsisartunik atugassaqtinneqaratta.

Aternik taaguinngikkaluarluta 1800-kkunni inuusimasut taalliaasa ilaat ullumikkut sulii ilaatigut juullikkunni killinnagaartumik tussiartarpavut.

Taalliortullu nutaanerujartortut taalliaat ilaani nipilersorneri nutartilaarlugit nuannivissunik nipilersorneqartut erinarsortarpavut.

Ukiunilu nutaajunerusuni, pingaartumi ukiut kingulliit 40-50-ini tupinnaannartumik piginnaanilippassuit saqqumeralersimapput. Qularnanngitsumik nipilersoqatigiit SUME annertuumik kajumissaasuusimallutik. Taallioriaatsillu nutaat, ilaatigut sakkortunerarneqartartut saqqumeralernerisa kingunerini 70-80-ikkunni immiussisarfiit periarfissagissaarnerulerisigut cassettebåndet, nuussuillu amerlasuut pinngorartinneqarsimapput. Kiisalu 80-ikkut qiteqquteriilaarneranni CD-it tupinnartorsuit atugaalerput, tamatumalu kingunerani immiussinerit amerlasoorpassuit pisalerput. Inuit ilaat allaat atortorissaangaaleramik nammineerlutik immiussisalerput.

Ullumikkut kisisaanngiusattunik erinarsugassaqalernikuullutalu, nipilersorluta ilaagassaqalernikuuvugut.

Erinarsuutit eqqartortillugit eqqaanngittoorneqarsinnaanngitsuttaaq tassaapput nunaqqaterpassuagut nipilersuutunik assigiinngitsunik atuisinnaasut amerlasoorujussuummata. Inuusuttorpassuit pikkorilluinnarlutik nipilersuutunik assigiinngitsunik atuisinnaapput. Aammattaaq ukiuni kingullerni qujanartumik qilaatersorneq nunatsinni atorluarneqaleriartortoq nuannaarutigalugu oqaatigisariaqarpoq. Siulersuatta qilaat amerlasuutit atorluarsimagaat qaammaassaqarfigiartoqqilerparput. Allaammi aqqiagiinnginnerit qilaatersornikkut aqqinneqartarsimarni ilisimavarput.

Nunarsuarmioqataanitsinni, Nunallu sanilitta suleqatigiinnikkut nukittorsaqatiginerini naapittarnerinilu assigiiffigut ilisimaarillualersimavarput, tassalu erinarsoqatigiittarnigut.

Ilaatigut erinnat assigiit atorsinnaasarpavut oqaatsit arlariit atorlugit. Taamaattumik siunnersuutip imarisamigut tapersorsornartuunera oqaatigeqqissavarput.

Kissaatiginassaarlu nalilersuisussat erinnat taallallu qanoq amerlatigisut katersorneqassanersut minnerunngitsumik suut erinnat taallallu katerserneqassanersut suliarilluarumaaraat.

Neriulluta una ukiorpaalussuanngortuni oqallisigineqarsimasoq piviusunngorumaartoq sulisussat sulilluarnissaannik kissaappavut.

Qujanaq